

VENDIM
Nr. 203, datë 4.10.2021

**MBI PAJISJEN ME CERTIFIKATË TË GARANCISË SË ORIGJINËS, PËR
PERIUDHËN KALENDARIKE 2020, PËR IMPIANTIN E PRODHIMIT TË
ENERGJISË ELEKTRIKE “HEC BANJË”, TË SHOQËRISË “DEVOLL
HYDROPOWER” SHA**

Në mbështetje të nenit 16, të ligjit nr. 43/2015, “Për sektorin e energjisë elektrike”, të ndryshuar; të nenit 16, pika 6, të ligjit nr. 7/2017, “Për nxitjen e përdorimit të energjisë nga burimet e rinovueshme”; të nenit 7, të “Rregullores për lëshimin, transferimin dhe anulimin e garancive të origjinës për energjinë elektrike të prodhuar nga burimet e rinovueshme”, miratuar me vendimin e Bordit të ERE-s nr. 229, datë 20.12.2019; dhe të nenit 19, pika 1, germa “a”, të “Rregullores për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 17.6.2016, Bordi i Entit Rregullator të Energjisë, në mbledhjen e tij të datës 4.10.2021, mbasi shqyrtoi relacionin e Drejtorisë së Licencimit, Mbikëqyrjes dhe Autorizimeve me nr. 124/1 prot., datë 30.9.2021, lidhur me “Pajisjen me certifikatë të garancisë së origjinës për impiantin e prodhimit të energjisë elektrike ‘HEC Banjë’, të shoqërisë ‘Devoll Hydropower’ sh.a.”,

konstatoi se:

- Në vijim të komunikimeve shkresore dhe së fundi me shkresën e protokolluar në ERE me nr. 882/2 prot., datë 22.9.2021, shoqëria “Devoll Hydropower” sh.a., ka kërkuar:

- pajisjen me certifikatën e garancisë së origjinës për energjinë elektrike të prodhuar nga “HEC Banjë” për periudhën 1.1.2020–31.12.2020;

- zgjatjen e vlefshmërisë së garancisë së origjinës për “HEC Banjë” për periudhën kalendarike 2021.

- Impianti prodhues “HEC Banjë” nuk ka pësuar ndryshime referuar kërkesave të “Rregullores për lëshimin, transferimin dhe anulimin e garancive të origjinës për energjinë elektrike të prodhuar nga burimet e rinovueshme”.

- Kërkesa e shoqërisë “Devoll Hydropower” sh.a. i nënshtrohet vendimmarrjes së ERE-s për sasinë e energjisë elektrike të prodhuar nga “HEC Banjë”, për vitin 2020 (sasia prej 135,775 mWh).

- Sa i përket kërkesës së shoqërisë “Devoll Hydropower” sh.a., për zgjatjen e vlefshmërisë së garancisë së origjinës për “HEC Banjë”, për periudhën kalendarike 2021, duke qenë se kjo e fundit nuk ka dokumentuar shifra konkrete, në zbatim të nenit 16, pika 6, të ligjit nr. 7/2017, “Për nxitjen e përdorimit të energjisë nga burimet e rinovueshme”, dhe të nenit 11, pika 3, të “Rregullores për lëshimin, transferimin dhe anulimin e garancive të origjinës për energjinë elektrike të prodhuar nga burimet e rinovueshme”, ERE shprehet vetëm për energjinë elektrike realisht të prodhuar nga impianti. Si e tillë, shoqëria duhet të dokumentojë në ERE sasinë faktike të energjisë elektrike për vitin 2021.

Për gjithë sa më sipër, Bordi i ERE-s

VENDOSI:

1. Të pajisë me certifikatë të garancisë së origjinës impiantin e prodhimit të energjisë elektrike “HEC Banjë”, të shoqërisë “Devoll Hydropower” sh.a., për një periudhë 12-mujore (1.1.2020–31.12.2020), për sasinë e prodhuar të energjisë elektrike 135,775 mWh.

2. Drejtoria e Licencimit, Autorizimeve dhe Mbikëqyrjes të njoftojë shoqërinë “Devoll Hydropower” sh.a. për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohet rishikim në ERE brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti